

畿輔通志卷一百三十九

畧九十四 金石二

順天二

大興宛平下

元

白雲觀處順堂會葬記

謹案陳時可撰本碑文云長春宗師旣逝嗣其道者尹公乃易其宮之東甲第爲觀號曰白雲明年四月除地建址凡四旬堂成榜之曰處順旣祥奉骨以葬考邱處機歿於丁亥七月其明年爲戊子歲是堂肇工於四月四旬而成旣成而葬碑云祥者其小祥乎則是碑當立於戊子之秋矣陳時可元史無傳太宗時擇蒙古漢人子弟習語言文字命提領陳時可管勾見宣諭奪羅解等碑又趙州重建柏林禪院碑前署宣差燕京路課稅

長官兼提領編修所司天臺事陳時可撰海雲印簡篆額末云王寅歲立石王寅爲六皇后稱制之元年上距戊子十四年印簡卽祐聖國師與時可爲同時人

碑陰題名

謹案前碑文云以會葬者之名刻於石陰

長春真人邱處機本行碑

謹案陳時可撰本碑文云丁亥五月有旨以瓊華島爲萬安宮天長觀爲長春宮七月留頌葆光而歸真焉考元史釋老傳邱處機登州棲霞人自號長春子歲己卯太祖自乃蠻命近臣持詔求之處機乃與弟子十有八人同往見焉處機還燕丁亥賜宮名曰長春遣使勞問卒年八十大畧與碑同

長春真人邱處機成道碑

謹案姬志真撰本碑文云大定戊申金世宗徵赴闕特旨住全真堂辛亥復居濱都之太虛觀己卯冬赴召及見帝嘉其誠癸未春敕建長春宮云云則史稱金世宗召不赴之語非事實矣建長春宮之前碑云丁亥與史合此碑云癸未考處機見成吉思皇帝爲壬午歲而傳載癸未歲有諫畋獵事蓋其時尚未旋燕疑此碑誤也又按兩碑皆無建立年月前碑陳時可撰應與會葬記同時此碑撰人姬志真尙有所作夏真人道行一碑約在至元初則此碑年月或當稍後茲姑以類從列此

萬松老人塔額

萬松老人金元間僧也自稱萬松野老居燕京從容菴移

刺楚材一見老人遂參學三年老人以湛然目之今乾石橋之北有磚甃七級高丈五尺不尖而平年年草榮其頂

有石額五字焉曰萬松老人塔

帝京景物畧

謹案萬松圓寂建塔均不知何年考納蘭成德淥水亭

雜識云老人從文正王索琴王以承華殿春雷及種玉

翁悲風譜贈之耶律楚材雖通籍金世但爲散官元太

祖定燕聞其名召之始處左右至太宗卽位之三年乃

拜中書令春雷金之名琴與名玉振者均藏承華殿楚

材取以遺其友蓋非顯達受賜不得矣以此證之知萬

松之寂當在太宗朝而塔之建立可意度其不遠又考

續藏所收萬松老人請益錄其序有云自庚寅九月且

請益云云庚寅爲金世宗之大定十年卽元太宗卽位

之二年此錄記其師評唱宗風之語疑在金而不在元
不足爲此額之佐證耳

周子祠堂碑銘

謹案文見郝經陵川集云領中書相國楊公建太極書
院於燕都立祠於院以祀周子以二程張楊游朱六子
配祠旣成適經貳於公而徵銘焉遂敘其事而爲之銘
考元史楊惟中傳惟中字彥誠宏州人太宗器之皇子
闊出伐宋命惟中於軍前行中書省事克宋棗陽光化
等軍光隨郢復等州及襄陽德安府凡得名士數十人
收伊洛諸書送燕都立宋大儒周惇頤祠建太極書院
郝經傳經字伯常其先潞州人徙澤州之陵川金亡徙
順天爲守帥張柔賈輔所知延爲上客二家藏書皆萬

卷經博覽無不通憲宗二年世祖以皇弟開邸金蓮川
召經云云而不言經爲楊惟中參貳之事殊疏漏又考
經太極書院記云建院在庚子辛丑間則太宗在位之
十二三年也

義勇武安王廟碑

謹案文亦郝經撰見陵川集其辭云郡國州縣鄉邑閭
井皆有王廟夏五月十有三日秋九月十有三日則大
爲祈賽云云考金泰和詔建昭烈武成王廟於闕庭之
右麗澤門內此碑蓋在廟中

邵子太極圖石刻

周子通書石刻

張子西銘石刻

庚子辛丑間中令楊公立周子祠刻太極圖及通書西銘

等於壁

郝經太極書院記 謹案此記刻石無左驗故不列

華嚴寺七真洞壁詞石刻

上華嚴寺下華嚴寺俱正統間建寺有二洞一在山腰一

在殿後曰七真洞或曰卽翠華洞洞中石壁鐫元耶律丞

相一詞

長安客話

華嚴寺嘉靖庚戌虜闌入寺燬焉存者二洞華嚴七真洞

壁刻元耶律氏詞也人口楚材者譌

帝京景物畧 謹案詞調係鷓鴣天湛然

居士集載之劉侗以爲譌豈有據耶

在香山七真洞壁

京畿金石考

慈恩寺貴戒師圓寂記

京大慈恩寺貴戒師圓寂記大朝丙午

觀妙齋金石文考畧

謹案元中統以前無國號紀年文書行下但稱大朝而定宗卽位之年爲丙午歲此碑蓋立於是年

宣諭奪羅斛等聖旨碑

通諭夏學子弟員等聖旨碑

元太宗卽位之五年建國子學於燕京御製宣諭二通其一通諭奪羅斛等及十投管象等官方是時遣蒙古子弟一十八人習漢人語言文字復掄漢人子弟二十二入習蒙古言語弓箭命提領陳時可擇二名管勾并主守孔子廟道人馮志亨選秀士二人通儒道二人分作四牌子教讀此蛇兒年六月初九日所頒也其一通諭受學子弟員習漢人文書之外兼諳匠藝事所頒年月與前同不書日意稍後不過旬日耳後十六年當定宗崩之明年己酉十

月望日夫子廟住持賜紫知觀李志元始礮石刊置學中
其左方序列蒙古必閣赤自札魯古真以下凡十九人漢
人必閣赤自文宣奴而下凡二十八人必閣赤譯言書生
也又列宣授蒙古必閣赤四牌子總教馮志亨宣授金牌
提舉國子學事中書楊惟中御前宣議國子學事仙孔八
合識李志常三人銜名入合識譯言師傅也

宋濂潛
溪集

必閣赤文宣奴等題名

必閣赤札魯古真等題名

總教馮志亨等題名

謹案皆在聖旨碑左方見前

潭柘寺歸雲大禪師塔銘

陳時可撰正書定宗二年三月直隸大興

寰宇訪碑錄
謹案大興當作

宛平

大佛頂尊勝陀羅尼幢

普會寺遼之駐蹕寺也在阜城門外玉河鄉池水村殿前石幢一書大佛頂尊勝陀羅尼後題大朝歲次己酉年十一月十七日宣差濱隸大使張鉢信順建王府下斷公事

官普元奴立

詠歸錄

普元奴立大朝己酉十一月立在玉河鄉池水村按此是

定宗四年

京畿金石考

謹案定宗無四年已見前說是時定宗皇后幹瓦立海迷失抱子失列門垂簾聽政者六月惟戊申至庚戌凡三年不知聽政六月爲何年之事史云行事失書則己酉是否稱制之年莫可考矣

玉清觀碑

謹案趙復撰燕京玉清觀碑云甘泉坊有東嶽行祠燕有隱君子馬天麟斥地數畝建玉清觀云云其年月未詳考元史儒學傳趙復字仁甫德安人也大宗乙未歲伐宋德安其民皆俘戮時姚樞奉詔卽軍中求儒釋道醫卜士凡儒生挂俘籍者輒脫之以歸復在其中先是南北道絕載籍不相通至是復以所記程朱傳注書錄付樞自復至燕京從學者百餘人世祖在潛邸嘗召見問取宋對曰宋吾父母國未有引他人以伐吾父母者世祖悅因不强之仕復以江漢自號學者稱之曰江漢先生是復之居燕始太宗乙未下迨中統初凡二十五年世祖卽位不聞有詔諏之事疑復已殂謝矣此碑以

時計之當在定憲之世

尹志平碑

謹案弋穀撰尹宗師碑文云尹志平字太和萊州人受
易於郝太古覲長春真人於棲霞觀執弟子禮太祖皇
帝徵長春真人師勸行北上時從者十八人師爲之冠
考此碑無歲月弋穀亦史傳所無但以時計之當列於
此又案十八弟子名見明李得晟所立白雲觀碑曰趙
道堅宋道安尹志平孫志堅夏志誠何志清張志素李
志常綦志清潘得冲孟志穩鄭志修鞠志圓于志可王
志明宋得方張志遠楊志靜則尹志平之上猶有趙道
堅宋道安二人不得云爲十八人之冠矣

中書令耶律楚材墓碣

甕山下數十武元耶律楚材墓墓前有祠祠廢象存象以石存也石表碣石馬虎等已零落一翁仲立未去天啟七年夏有螢十百集翁仲首土人譁曰石人眼光也質明共踣而爭碎之而墓前無餘器矣

帝京景物畧

近日一友人治別業於京城外西山忽發一塚開櫬得大頭醢加常人幾倍不知爲何人葬地未幾掘得碣石則楚

材墓也

萬歷野獲編

謹案宋子貞撰楚材神道碑云中統二年十月二十日葬後七年立神道碑景物畧及野獲編所載碣石當是初葬時墓前碣也若池北偶談所云則神道碑也今分列之繫此於中統二年以昭鑒別

佑聖國師塔頌

九級者額曰特贈光天普照佛日圓明海雲佑聖國師之
塔碑題燕京編修所次二官王萬慶撰畧曰海雲名印簡
山西之寧遠人八歲禮中觀沼公受戒修童子行年十一
能開衆講義濟衆凶歲金宣宗聞之賜號通元廣惠大師
寧遠城陷師與中觀皆執成吉思皇帝遣使語太師國王
曰老長老小長老可好自是天下稱小長老焉一夕夢神
速其行乃來燕時中和老人章公住燕之慶壽寺夢僧杖
而入門踞獅子座是日師至師所著語錄曰雜毒海

帝京景物畧

謹案元史劉秉忠傳云秉忠隱武安山中天寧虛照禪
師招致爲僧世祖在潛邸海雲禪師被召邀與俱行海
雲南還秉忠遂留藩邸而帝京景物畧云海雲象門弟

子劉秉忠贊之考秉忠卒於至元十一年八月海雲圓
寂當在其前此塔額應列至元之初又案趙孟頫臨濟
正宗碑云海雲大宗師簡公大弟子二人可菴朗公頤
菴僊公朗公度華菴滿公太傅劉文貞公僊公度西雲
大宗師安公云云則秉忠又印簡法孫與史傳均不合
長春宮瑞應記

至元二年就長春宮設金籙大醮有羣鶴翔舞下掠壇墀
去而復來者累日天子命詞臣作瑞應記刻之碑

甘水仙源錄

謹案日下舊聞載姚燧撰長春宮碑云太祖聖武皇帝
與長春子語雪山之陽師之所對帝大然之曰天遣仙
翁以寤朕志命左史書其言又敕徐世隆載諸靈應之
碑云云考元史徐世隆傳云世隆字威卿陳州西華人

金正大四年進士其父戒世隆毋急仕進遂辭官歲壬辰父歿癸巳世隆北渡河嚴實招致東平幕府世祖在潛邸召見欲留之中統元年擢燕京等路宣撫使三年除太常卿至元元年遷翰林侍講學士詔命典冊多出其手是世隆升爲朝官之時太祖崩已久此碑蓋撰於至元之初日下舊聞刪取本碑中有闕脫遂若敕記靈應爲太祖之命誤矣又考世隆所撰爲靈應碑此則爲瑞應記疑卽一篇也

玉虛觀大道祖師傳授碑

楊果撰商挺書在罐兒胡同今未見

京畿金石考

謹案金石考列此碑於虞集趙孟頫書撰諸石之後殆未考其時爾元史楊果傳果字正卿祁州蒲陰人金正

大甲申進士偃師令金亡歲己丑楊奐徵河南課稅起
果爲經歷中統元年爲北京宣撫使明年拜參知政事
至元六年出爲懷燕路總管以老致政事於家商挺傳
挺字孟卿曹州濟陰人嚴忠濟辟爲經歷楊惟中宣撫
閩中挺爲郎中世祖卽位宣撫陝蜀至元元年入拜參
知政事三年與姚樞竇默王鶚楊果纂五經要語九年
封皇子忙阿剌爲安西王以挺爲王相二十五年卒溯
挺之在京朝惟至元元年至九年且與楊果共事其後
二十年雖復樞密副使然方以趙炳之獄株累囚繫宜
無文翰之興又其時楊果死已久矣茲約畧置此碑於
至元之初庶符實事

眞常眞人李志常道行碑